

VROOGER 1

Vrooger doew wiej nog zukke jongs wadn en non proat ik oawer zun zestig töt viefezestig joar leên, doew wonn wiej zun betje an de kaant van Boorn, zo teegn Vuur-Zeandern an. An Wissinks (Ubbink) zienn broak en an n eand van de weg doar wonn Broakn Wilm (Konink) met Miejke. n Luk veerderop doar haj t Strik, doar wonn Eeuwersboer en Kruuskaamp. Wiej hadn doar de ruimte um te spöln. Vuural op n Broakn mös. Doar was heide, heuvelkes, denn en bearken. In t midn doar lag nen grooten plas. Doar zatn katviskes en salemanders in. De wienterdag hoômn t ja mer enen nacht te vreezn of wiej konn doar al schaatsn. Mer ook bieje oens achter t hoes was ne groote ruimte, ook doar was völ hei, dat heurn van 'n Poedel (Nijhof). Doar spöln wiej völ indiaantje en kow-boj en dan gung t er soms slim an too.

Mer vuural de wienterdag ha'j van dee daagn dat t biester koold was. Zo van dat miezerige mistige weer met ne temperatuur zo van um t vreespeunt. Dan was t in hoes wa gezellig dat mu'k zegn. Wiej hadn nen grootn greunn kolom-kachel en den stun zon aanderhalve meter van de muur of in de kamer. Ne



Ik veurn zun betje teegn de Poaterskerk an in Zeandern

grote zwatte piep leup noar boam met nen knik noar n schösteen. Der um hen nen grootn iezern ring, doar ko'j de veut op zetn. In n boosem kon wiej met zien dreeën of veern zitn. Vuural zoaterdag smiddags. Oens opa kwam elken zoaterdag teegn twee uur bieje oens. Behalm n eersten zoaterdag van de moand, dan was hee n half uur later, want hee was noar Zeandern hen biechtn wes. Oens opa (ze neumn hem ok wa Dasjans) kon gloepens mooi verteln. Vuur dat hee bieje Spanjaard kwam, was hee vrachtrieder bieje "de Grutter" (Erve ten Cate) en oet dee tied verteln hee geêrn. t Was op 'n moal dat ik noar hoes veurn, zo verteln hee, t was zoaterdagmiddag en aln luk laat want t begun al doenker te wodn. Ik veurn zun betje teegn de Poaterskeark an in Zeandern doew begunn de peere te zweetn en konn de waagn hoas nig meer trekn. Ik dag was dat non. Ik van de waagn of um te kiekn wat ter an de haand was. Doar zat mie achter op de waagn ne groote zwatte kat. Ik dach hoe koemp den doar now. Ik jaagn m vot. "Weg smerige kat, vot iej". Ik wier op de waagn en joa heur doar gung e hen. Zo teegn Haarhoes t zölfde gedoo. Ik wier van de waagn en joa heur doar zatte wier, dee grote zwatte kat. Ik zea teegn de kat "Kom iej van God of van de duuvel, aj van God komt zeg mij wat er is mer aj van de duuvel komt maak dan da'j weg komt". Ik sleug n kruus en vot was hee. Wordt vervolgd.

Nahoj Moobeznag.